



*ema hotu iha direitu, no direitu ba ema hotu*

## Komunikadu ba Imprensa

Kona-ba

### **Rejeita desizaun tribunal nudar atetudi ameasa ba prinsipiu *Estado do Direito e democratico***

Relasiona ho polemika nebe mosu iha publiku depois-de Tribunal Rekursu decide inskonstitusionalidade ba Fundus Estabilizasaun Ekonomika (FEE) nebe iha Lei Orsamentu Reaktifikativu tinan fiskal 2008, maka HAK konsidera katak reasaun husi lider balu laos kontribui atu dezenvolvi prinsipiu *Estado do Direito e Democratico* (*negara demokrasi berdasarkan hukum*), maibe hamosu presedenti nebe haburas liu tan atetudi ema la respeita lei, no hahi liu mak poder.

Tuir Jose Luis de Oliveira, Diretor Asosiasaun HAK katak, “Komentariu husi Primeiru Ministro Xanana Gusmao, hatudu imajen la diak ba publiku Timor-Leste nomos internasional. Tamba ho liafuan husi Sr. Xanana nebe dehan katak nian sei la kumpri desizaun Tribunal, fo lisaun negativu ba povu atu la respeita ita-nian orgaun soberania tribunal, liuliu tan ba prinsipiu atu respeitu ba lei, tuir buat nebe regula iha artigu 1 Konstituisaun RDTL”.

Tuir HAK nian prespektiva katak, iha sistema estadu demokratiku modernu agora, respeita lei no desizaun tribunal nudar fundamentu prinsipal ba moris demokrasia. Poder nebe hetan husi povu (demokrasia) tenki halao tuir lei, laos tuir fali forsa ida-ida nian hakarak. Ne’e laos tempu ona! Tempu uluk mak ukun-nain sira hetan no halao ukun tuir kbiit forsa ninian, agora labele ona. Iha paizes balu, agara sei uza modelu estadu monarkhi, nebe liurai sira mak kaer ukun boot, hanesan Inglaterra, Japaun, Thailandia, Holanda no seluk-seluk tan. Maibe liurai sira ne’e laiha ona poder absoluta (poder tomak). Sira halao sira nian poder tuir konstituisaun, no kumpri desizaun tribunal. Ne’e duni, ironiku tebes mai ita Timor-Leste nebe opta modelu estadu republiku (povu mak nain), maibe atetudi ka mentalidadi nain-ulun sira hanesan fali liurai antigu sira .

Kestaun kona-ba preukupasaun Primeiro Ministro ba povu nian susar, ne’e buat ida nebe ema hotu la-nega. Maibe laos razaun nebe justu bainhira tamba deit tenki halao programa atu responde povu nian susar, depois ita sakrifika fali prinsipiu importanti nebe lolos mos sei garanti atu rezolve povu nian susar iha tempu agora nomos tempu futuru. “Ita imajina tok! Se agora mak ema la respeitu lei no desizaun tribunal, maka komitmentu governu AMP atu kombate korupsaun sei la folin (folin laek). Tamba governu AMP rasik mak enfrakeza orgaun nebe iha kompetensia atu hapara korupsaun ne’e”, dehan Jose Luis.

Tribunal mak uniku orgaun nebe bele tesi kazu ba korupsaun, laos fali Komisaun Kontra Korupsaun. Korupsaun akontese oin-oin, husi hahalok simplis foti osan estadu ba interese privadu, manipula faktus hodi hetan benefisiu husi rekursu publiku, fo tender la tuir regras aprovizionamentu, to’o hahalok sufistikadu liu mak hasai lei ruma nebe kontraditoriu ho konstituisaun hodi bele fo benefisiu ruma ba entidades privadu ruma. Hanesan desizaun ba estabesimentu FEE la tuir konstituisaun no Lei Fundus Petroleo nebe ezisti ona. No iha potencia boot katak, osan nebe barak (USD 250 milliaun) la lori benefisiu ba povu, maibe ba emprezariu sira nebe hetan “previleiju” ba importaun sasan husi liur. Faktus hatudu katak atu remata tinan fiskal 2008, sasan folin sasan sei karu nafatin. Perguntas mak ne’e, osan ne’e gasta ba nebe, no nusa mak

povu seidak goza benefisiu ruma? Osan FEE atu halo estabelizasaun ekonomia se nian, povu nian ka emprezariu sira nian? No emprezariu nebe mak hetan?

Modelu korupsaun “sufistikadu” ka iha Indonezia dehan “korupsi politik” (korupsaun nebe mosu husi desizaun politika) hanesan esperiensa ba dala-rua nebe akontese iha Timor-Leste. Ba dala-uluk mak Parlamentu periudu uluk hasai lei kona-ba pensaun vitalisia ba eis membru parlamentu no eis titular orgaun soberanu. Tamba liu husi lei ne’e, fo benefisiu espesial ba ema lubuk oan ida nebe servisu soim-sala deit duranti tinan 5. Eis deputadu sira servisu deit tinan 5, sira ho sira nian familia goza fasilidadi estadu duranti moris tomak.

Jose Luis mos hatutan katak agora dadauk politiku-nain sira hanesan hakfodak ho osan nebe mai husi ita-nian minarai, hodi nune sira halo politika gasta osan arbiru deit nebe la tuir prinsipiu lei no la konsidera ba aban-bainrua, hanesan halo FEE, sosa kareta barbarak, gastu ba perdiem maibe la ba halo servisu. Politiku-nain sira haluhan katak, minarai ne’e to’o tempu ida sei maran, no populasaun sei aumenta.

Husi parti seluk, Jose Luis de Oliveira mos preukupa katak atetudi la respeita desizaun tribunal no konstituisaun laos foin akontese ba dala-uluk agora ne’e. Nain ulun sira viola dala hira ona konstituisaun no desizaun tribunal. Exemplu, bainhira Tribunal “Painel Espesial ba Krimi Grave” iha tinan hirak liu ba hasai mandatu kapturasaun ba Eis Jeneral Wiranto nebe deskonfia komete krimi grave 1999, ita nian lider boot balu halo interferensia ba desizaun tribunal ne’e hodi labele ezejuta. Nune mos konstituisaun RDTL artigu 160 regula katak krimi boot kontra umanidadi tenki rezolve tuir tribunal nasional ka internasional, maibe mandatu konstituisaun ne’e, ita-nian ulun-boot sira la kumpri, no pur-kontrariu estabelese fali Komisaun Verdade no Amizade nebe ho intensaun atu fo amnestia ba autor prinsipal krimi boot 1999. “Hahalok sira hanesan ne’e bele sai toman-a’at ka “kultura” iha ita nian nasaun, no ne’e kontraditoriu tebes ho objetivu ita-nian estadu nebe regula iha artigu 6 Konstituisaun RDTL”, tenik Jose Luis.

Jose Luis mos rekoñese katak, hahalok la kumpri lei no desizaun tribunal laos deit akontese husi nain-ulun nebe kaer ukun agora, maibe mos ba governantes anterior. “Uluk iha tinan 2002, bainhira Tribunal Distritu Dili hasai desizaun kona-ba kazu Alfandega tahan ema nian sigaru, nebe governu sala no tenki selu kompesasaun, no Primeiro Ministro momentu nebe, Sr. Mari Alkatiri mos manifesta atetudi la respeita desizaun tribunal. Momenta nebe Sr. Mari dehan katak nian sei la kumpri desizaun la-hun la-dikin husi tribunal”, Jose Luis fo hanoin kona.

Ne’e duni, tuir Jose Luis katak, demokrasia no prinsipiu “*Estado do direito*” iha Timor-Leste sei infrenta dezafiu boot, tamba deit ita-nian lideransa sira sei iha tranzisaun husi mentalidadi antigu ba valores foun nebe konsagra iha ita-nian konstituisaun. “Ita nian konstituisaun modernu, maibe ema nebe implementa mak sei atrazadu”, dehan Jose Luis.

Jose Luis hein katak povu hotu bele matan-nakloke no iha konsiensia diak ba esperiensa sira hanesan ne’e, hodi hakas-a’an nafatin atu hapara hahalok sira nebe la diak, nebe bele lori konsekuensia la diak ba ita-nian povu no jersaun tuir mai. “Se prinsipiu *estado do direito e democratico* mak la implementa ho didiak, maka konsekuensia mak povu kiik no ita hotu nian oan no bei-oan mak sei moris susar no injustisa”, dehan Jose Luis.

Dili, 24 Novembru 2008

---

*Atu hetan inforsaun tan, bele kontaktu Antonio Maria Soares at HAK Association  
Mobile +670-727-1458 or email atm\_soares@yahoo.com*